

Gojgaeq Bouxgaujseng Bi 2018 Vahcuengh Sawcuengh Suijbingz Gaujsi (1)

2018 年度壮语文水平考试考生故事 (一)

□ Veiz Yingjinh Cau Dwzfeih raiz Dahlinz / 杨燕琳 hoiz

8 nyied 13 hauh, bi 2018 Vahcuengh Sawcuengh Suijbingz Gaujsi cingzcik ndaej goengbounh okdaeuj. Gicej daj Swcigih Minzyijveij rox siusik, Vahcuengh Sawcuengh Suijbingz Gaujsi baen miz cogaep, cungaep, gaugaep sam aen daengjgaep, gij cingzcik gak daengjgaep youh baen baenz gyap, iet song aen daengjgaep, ndawde, 80 faen caeuq 80 faen doxhwnj dwg gyap daengj, 60-79 faen dwg iet daengj. Baez gaujsi neix gungh miz 371 vunz camgya, gyoengqde daj Nanzningz, Liujcouh, Fangzcwnzgnggangj, Ginhcouh, Gveigangj, Bwzswz, Hozciz, Laizbinh, Cungzcoj daengj 9 aen singz neix daeuj, ndawde miz 113 vunz camgya cogaep gaujsi, habgeklwd dwg 57.5%, 80 faen doxhwnj miz 30 vunz; 171 vunz camgya cungaep gaujsi, habgeklwd dwg 40.9%, 80 faen doxhwnj miz 15 vunz; 87 vunz camgya gaugaep gaujsi, habgeklwd dwg 19.5%, 80 faen doxhwnj miz 2 vunz.

Gicej youq mwh caijfangj rox siusik, youq ndaw gaujseng mbouj-danh miz boux lauxsae Cuengh Gun song saw vah, bouxbien Sawcuengh daengj guh hong Vahcuengh Sawcuengh ciennieb, lij miz gunghvuyenz, bouxfucwz meizdij, godij sanghhu, hagseng da cunghconh yenyau, gunghshw cizyenz, cwnzyangh gihminz, duiyouh ganbu daengj boux gyaemaij Vahcuengh Sawcuengh daj ndawbiengz gak hangznieb daeuj haenx. Caeuq gij faensoq yiemzgek cinjdeng doxbeij, gij goj gyoengqde bae camgya gaujsi engqgya miz eiqsei, geij ngoenz neix gicej caijfangj le 4 boux gaujseng, seizneix couh faenyiengj gij ginglig, daejniemh roxnaeuz naemjingex gyoengqde miz-gven Vahcuengh Sawcuengh Suijbingz Gaujsi haenx.

Vangz Leiz(bouxfucwz meizdij): Gij doenghlig gaujsi, daj aen sim langh-baij vwnzva Vahcuengh Sawcuengh daeuj

“Gauj ndaej baenzlawz la?” “50 faen, caeuq baez daih’ it doxdoengz.” Vangz Leiz naeuz, ciep roengzdaeuj, dienhvah baihaenx couh cienz daeuj sing riu angqyangz ndeu. “Baezlaeng lij bae gauj lwi?” “Wnggai caiq bae ba.” Mwh gangj ok dapanq de mbouj ngeizlaengx saekdi. Bi 2016 bae gauj gaugaep gauj mbouj gvaq, bi 2017 bae



▲ Vangz Leiz (gvaz) aeu Vahcuengh caeuq goenggeq ganggoj.

► Vangz Leiz.



gauj cungaep gauj gvaq lo, bineix caiq bae deuqnyex “gaugaep”, neix gaenq dwg Vangz Leiz baez daihsam camgya Vahcuengh Sawcuengh Suijbingz Gaujsi. 8 nyied 20 hauh, mwh ciepsouh gicej caijfangj, de cazyawj le gaujsi cingzcik, yienznaeuz gauj mbouj gvaq, hoeng neix dauq mbouj yingjyangj gij ndatcingz de hag Sawcuengh.

Vangz Leiz bineix ndaej 41 bi lo, de doekseng youq Hozciz Si Fungsanh Yen Sanhmwnzhaj Cin aen mbanj iq ndeu, Vahcuengh dwg vahcoj de, hix dwg cungj vah de nyinhnaeuz daengx seiqgyaiq cieq gyaundeideu. Yienghaenx Sawcuengh ne? De ndaej 10 bi bihaenx, mwh siujyoz hwnj aen haggeiz goq Sawcuengh, camgya gunghcoz le ndaej vunz soengq hawj cek 《SAWLOIH CUENGH GUN》 ndeu, gaiqbaiz caeuq goengcieng Sawcuengh bingzseiz yawjaen haenx, lij miz doenghlig daez Vahcuengh Sawcuengh Suijbingz Gaujsi hwnj muengx caz ndaej daengz haenx, doenghlig neix cungj hawj de roxyiuj le Sawcuengh. Sawcuengh doiq de daeuj miz gijmaz yunghcawq ne? Mboujlwnh dwg gaxgonq dang gvaq Hozciz Si Douzshw Coicaenh Giz gizcangj, roxnaeuz seizneix dang boux secangj Hozciz Si Yizbau Se, doeng-gvaq Vahcuengh Sawcuengh Suijbingz Gaujsi mbouj dwg aenvih gunghcoz

aeuyungh, lai baez bae camgya gaujsi, gij doenghlig de youh daj gizlawz daeuj ne?

“Gizsaed dwg miz di siengjap he.” Doiq gij vwndiz gicej cam haenx, Vangz Leiz cungj nyinhcaen lauxsaed bae gangj. De roxnyinh, vwnzva Bouxcuengh goekdaej laegna, doenghlig sawloih raeuz ngoenznaengz yungh haenx caeuq fwen raeuz cungj ndei raixcaix, hoeng aiq dwg rengzvunz mbouj gaeuq roxnaeuz gizdieg soucomz mbouj doengz daengj yinhsu, seizneix aen cang rom sawloih Sawcuengh caengz ndaej souhaeuj, roxnaeuz fanhoiz mbouj ndei geijlai. “Gij Vahcuengh gou nyi haenx lai dangqmaz, hoeng mbouj ndaej haemq ndei bae baij okdaeuj, beijlumj ‘hujdengdeng’ aen sawloih neix yungh vahdoj raeuz gangj okdaeuj sengdoengh dangqmaz, hoeng yungh Sawcuengh sij okdaeuj couh bienq-yiengh lo.” Vangz Leiz naeuz, “daegbied dwg gij soujap fouq beij hingq ndaw fwen, lij miz ‘vahbyonj’ raeuz, it, sam, haj cih baez byonj, de cij gangj gij singmeh cih daih’ it, daihsam, daihhaj, couh bienq baenz coenz ndeu roxnaeuz song coenz vahbyonj lo, neix ak raixcaix, neix ndaej gangj dwg cungj vah’amq ndeu, hix dwg cungj vwnzva ndeu, hoeng dangqnaj lij caengz raen miz vunz daj gij gakkoh Sawcuengh bae yenzgiu gijneix.”

Danghnaeuz bonjfaenx rox yungh Sawcuengh, couh ndaej bae dienzbouj aen hoengq neix lo, yiengq gyoengq beixnuengx dauqungz langhbaiz gij vwnzva maenhndei Bouxcuengh.

Hag Sawcuengh lij miz aen yienzaen daegbied ndeu, couhdwg siengj yungh Sawcuengh daeuj geiq gij fwen daxmeh guh haenx. Daxmeh Vangz Leiz dwg boux canghfwen ndawbiengz ndeu, baez aj bak couh guh baenz fwen, caiqlij eu ndaej sengdoengh mizyinx lai, “Vihmaz mbouj geiq de roengzdaeuj ne?” Vangz Leiz naeuz, “beijlumj miz bouxhek daeuj daengz, (aeu fwen)heuh lwnyenz ndaw ranz baet deih, ndenq raemx, hai dou, couh lumj 《SEI MOEGLAMZ》 ‘hai dou rug baihdoeng, naengh aen mbonq gok sae, naengh henz cueng daj roi, ciuq gingq nem vahlenj’, caen dwg sengdoengh lai, hoeng mbouj miz vunz bae haivat gij doxgaiq neix, gou nyinhnaeuz hojsik lai, ndigah siengj nyinhcaen bae hag ndei Sawcuengh, baezlaeng miz gihvei le cingjleix doenghlig fwen neix okdaeuj.”

Camgya Vahcuengh Sawcuengh Suijbingz Gaujsi, dwg gij fuengsik Vangz Leiz hagsib Sawcuengh ndawde cungj ndeu, “Gaujsi ndaej genjcaz gij yienghceij caeuq naengzlig bonjfaenx, hix dwg cungj dauqhag caeuq hagsib ndeu.”